

SANTIAGO APOSTOLUA

Sarrera oharra

Senideok: Gure zaindariaren eguna ospatzeko alkartu gara. Ezinbestekoa dogu JAI egitea, eta eguneroko bizitzako gora-beherak alde batera iztea. Baina, kontuz! Jainkoak nahi dauan atsedanak eta jaiak danentzakoa izan behar dau. Eta hainbeste dagoz gure inguruan prekarietateak jota nora-ezean dabiltzanak. Gogoan izango doguz gure otoitzean eta baita gure eskintzan ere.



Liturgiak Santiago apostolua ospatzera gonbidatzen gaitu, eta goazen bere eskutik Jesusen jarraitzaile izatea zer dan bilatzera eta ospatzera, eta Jainkoari eskerrak emotera apostoluei esker garalako Jesusen jarraitzaile. Eskatu daigun ez dakiguzala falta gidariak, autorleak eta hain beharrezko doguzan profetak.

Sarrera abestia

**GOAZEN
BATERA**

**Jaunarekin egotera.
Goazen guztiok batera
Jaunarekin egotera.**

GUZTIOK

¹ *Pozik alkartu gaitezen
Aita bai dogu laguntzen.*

² *Seme-alaba bezela
zaindu gagizuz Zuk, Jauna.*

AGURRA

† Aitaren eta Semearen eta Espiritu Santuaren izenean.
—*Amen.*

† Jaungoiko gure Aitaren eta Jesukristo gure Jaunaren grazia eta bakea zuekin.
—*Bedeinkatua Jaungoikoa, Jesukristo gure Jaunaren Aita.*

Damu otoitza

† Sarriegitan erabilten dogu siniskerea alkarrengandik bereizteko eta ez alkarren zerbitzura jarteko. Damutu gaitzan:

—Jesus Jauna, apostoluengan aukeraketa sinbolikoa egin zenduana, *erruki, Jauna*.

—Jesus Jauna, zure jarraitzaileak erreinuaren mezulari egiten dozuzana, *Kristo, erruki*.

—Jesus Jauna, zerbitzari izateko aukeratzen eta bialtzen gaituzuna, *erruki, Jauna*.

† Erruki dakigula...

Aintza

OTOITZA

Jainko ahalguztidun betikoa, Santiago izan zan
Ebanjelioagaitik bere odola isuri eban lehenengo
apostolua;
egizu, haren odol-isurtzeaz sendotu dadila zure Elizea,
eta haren zaindaritzapean dagoan zure herriak,
zintzo jarraitu deiola beti Kristo Jaunari.
Zurekin eta Espiritu santuarekin batean.

Lehenengo irakurgaiari oharra (Ap Eg 4, 33; 5,12.27-33; 12,2)

Ezeren autorle izateko ondo ezagutu behar da; eta autortzekoagaz bat eginda egon. Begira zelangoa dan apostoluen autorkuntza: bildur bakoa, bulartsua, deigarria..., bizitza osoa jokoan jarten dauana. Eredugarria!

Apostoluen Eginetatik (Ap Eg 4, 33; 5,12.27-33; 12,2)

Egun hareetan, apostoluek adoretzu emoten eben Jesus Jaunaren biztueraren autormena, eta hareen eskuz herrian mirari eta harrigarri asko egiten ziran. Batzar Nagusiaren aurrera ekarri ebezan apostoluak, eta abade nagusiak honan itandu eutsen: «Ez geuntsuen, bada, zorrotz agindu, Horren izenean ez irakasteko? Zuok, barriz, Jerusalem osoa bete dozue zeuon irakatsiz, eta gizon horren odolaren erantzukizuna geuri ezarri nahi deuskuzue».

Pedrok eta apostoluek erantzun eben: «Jaungoikoaren esana egin behar da lehenengo, ez gizonena. Gure asaben Jaungoikoak biztu egin eban, zuok habetik dingilizka hil

zenduen Jesus. Jaungoikoak goratu egin dau bere eskumaz, eta Buruzagi eta Salbatzaile egin, Israeli bihotz-barritzea eta pekatuen parkamena emoteko. Geu gara gauza horreen testigu, baita Jaungoikoak bere esana egiten dabenei emoten deuten Espiritu Santua ere».

Erantzun honek haserre bizitan jarri zituan batzarrekoak, eta apostoluak hiltea erabagi eben. Eta Herodes erregeak Joanen anaia zan Santiagori ezpataz samea ebagi eutson.

Jaunak esana

Erantzun salmoa (66):



Jaunak Siongo atxilotuak erakartean,
ba gengozan amets-antzean.

Orduan bete jakun ahoa barrez,
gure mihina goratzarrez. R/.

Atzerrietan orduan esan eben:
«Jauna handikiro jokatua dabe».
Gugaz handikiro jokatua da Jauna:
hauxe da poza daukaguna! R/.

Bihurtu, Jauna, gure zoria,
Negeb-eko erreka-urak bezala.
Malkoz erein baeben
pozez batuko dabe. R/.

Haruntzakoan, hor doaz negarrez,
ereiteko gari-zorroatz; eroanez;
pozik etorriko dira honuntzakoan,
gari-azauak eskuetan. R/.

Bigarren irakurgaiari oharra (2Kor 4, 7-15)

Onura preziatua dogu sinismena, eta egoereak irakasten deusku gurea benetako sinismena dan ala siniskeria. Sinismena zaintzen, ospatzen eta zabaltzen dauana zoriontsua da.

San Paulo apostoluak Korintotarrei

Senideok: Ondasun hau bustinezko ontzitan darabilgu, honenbesteko indarra Jaungoikoagandik dala agertu dadin, eta ez geugandik. Alde guztietatik estutzen gaitue, baina ez itoten; larri gagoz, baina ez etsita; erasopean bai, baina ez eskutik itzita; lurrera botaten gaitue, baina ez hiltzen. Edonon eta beti Jesusen heriotzea daroagu gorputzean, Jesusen bizia ere gure gorputzean agertu dadin.

Bizi garean bitartean, beti heriotzara eroaten gaitue Jesusegatik; Jesusen bizia ere agertu dadin gure izate hilkor honetan. Holan, gudan heriotzeak dihardu; zuokan, barriz, biziak.

Liburu Santuak honan dino: «Sinistu dot, eta horregatik berba egin dot». Eta geuk ere sinismen espiritu bera daukagula, sinisten dogu, eta horregatik berba egiten dogu; jakinik Jesus Jauna biztu dauanak Berak biztuko gaituala geu ere Jesusegaz, eta Bere ondoan ipiniko, zuekin batera. Hau guzti hau, zuen onerako da; grazidunak ugaritzen dirala, hareen esker ona ere ugariagoa izan dadin, Jaungoikoaren aintzarako.

Jaunak esana

Ebanjelioari oharra (Mk 20, 20-28)

Jainkoaren aurrean eskale jarten gara. Baina, ba dakigu, gero, zer eskatzen dogun? Hasiko bagina Espiritua eskatzetik... Egin deiogun harrerea ebanjelioari Aleluia abestuz, zutunik.

† Jesukristoren ebanjelioa san Markosen liburutik

Aldi haretan, Zebedeotarren ama hurreratu jakon Jesusi bere semeakaz, eta aurrean ahozpeztu zan, eskabide bat egiteko. Jesusek itandu eutson: «Zer nahi dozu?» Eta berak: «Jesarriazo daizuzala nire seme biok, bata zure eskumatan eta bestea zure ezkerretan, zure erreinuan».

Eta Jesusek: «Ez dakizue zer eskatzen dozuen. Gauza al zaree zuek, Nik edango dodan kaliza edateko?» Hareek: «Bai, ba gara gauza!» Berak orduan: «Nire kaliza edan, bai, edango dozue; baina nire ezker eskuman jesarte hori ez dago nire eskuetan inori emotea; hori nire Aitak erabagiten dauan hareentzat da».

Beste hamarrak, hori entzutean, biziro hasarre jarri ziran anaia biekin. Jesusek, barriz, Beragana batu eta esan eutsen: «Badakizue herrietako agintariek gogor hartzen dabela menpean herria, eta handiek azpian hartzen dabela. Ez bedi izan holan zuen artean; bestetara baino: zuen artean handi izan nahi dauana, bego zuen zerbitzari; eta zuen artean lehenengo izan nahi dauana, bego zuen menpeko, Gizonaren Semea ere ez da etorri besteen zerbitzuak hartzera, besteak zerbitzera baino, eta bere bizia askoren erospen saritzat emotera».

Jaunak esana

HITZALDIA

Santiago eguneko hitzaldia gertatzerakoan burura jatortazan arazoak eta galderak hainbat eta hainbat dira: *Zelan hartu ete dogu sinismena? Zelan landu ete dogu? Zelan ospatzen ete dogu alkarregaz? Zelan eskuratzen ete deutsegu gure seme-alabei edo ondorengoei?...*

Santiago ez da San Inaziogaz lehian jarri behar dogun santua, bata gailegoena dala eta bestea dala euskaldunona esanaz, haren egunean ez dagoala mezea entzuteko "obligaziorik" amaitzeko. Zelango *txikikerietan* galtzen garan!

Ba dagoz sakonagotik egin geikezan galderak, Santiagogan apostolua ikusiz, eta Jesusen autorle edo testigu izatearren bere odola isurteraino bizi izan dauala autorletza hori kontuan izanik. Ba gara gu, geure berbeaz eta bizitzaz, odola isurteraino ez bada ere, Jesus Jaunaren autorle? Egiten dogu autorletza hori, besterik ez bada, geure etxean edo geure parrokan? Holango galderek *zirikatu* egiten gaitue eta urduri jarri, ezta?

Ba, ez deusku besterik esan lehenengo irakurgaiak: «*Apostoluek adoretzu emoten eben Jesus Jaunaren biztuerearen autormena, eta hareen eskuz herrian mirari eta harrigarri asko egiten ziran*». Horixe da, senideok, kristau izatea: Jesusen jarraitzaile, haren biztuerearen autorle... Espiritu Santuaren esanetara.

Pentsatzekoa da ea "*buztinezko ontzietan daroagula hain ondasun ederra*" esan deuskun Paulori jarraituta, ontzia apurtu ez ete jakun, eta hor zehar galdu ez dogun sinismena, guk besterik uste izan arren.

Gu ez gara *Jesusen autorle sutsuak*, ezta? *Jesusen biztuereak* —berba hori behin eta berrori erabili arren, batez ere hiletetan— *ez dauka eraginik gure eguneroko bizitzan*, ezta? *Sinismena autortzearren, bizitza galtzeraino* ez ginateke helduko, ezta? Hortxe dago gure jokabidea: apenas lantzen dogu gure sinismena: *ez dogu ebanjelioa irakurteko ohiturarik; ez eta mezatan entzundako irakurgaiak hausnartzekorik; edo sinismen hori elikatzeko, beharrezko dogula ospatzea, alkarbanantzea, jaunartzea eta pobretasunean bizi izatea ere ez dogu uste...*

Eta, behar bada, Elizearen zoriak ez gaitu kezkatu ere egiten, ez dogulako gure sinismenaren altzo eta euskarri ikusten. Ez ete da, gero, gure sinismena *kontsumo-iturri* bat, gure seme-alabengan ezelango eraginik ez daukana, geugan ere *ezkutuko* eta *autortu-ezineko* eraginen bat baino ez daualako? Ona litzateke hautsok astintzea Santiagoren apostolutza ospatzean.

Jesusek dei egin eutsen, eta haren jarraitzaile egin ziran; eta jarraitzaileen artean leku euken andrazkoek ere; eta ez bakarrik garbitzaile, sukaldari edo errekadista huts lez, benetako autorle lez baino. Orduko ezein taldetan ikusten ez zana!

Hori kontuan hartuta, ulertu daigun gure sinismena, ez Jainkoari gure ezinetan laguntza eskatzeko era bat (argi dinosku ebanjelioak *zer eskatzen dogun ez dakigula-ta*), Jesus, berari jarraitzean, ezagutzeko era lez baino, eta bere autorle izateko amesean, eta taldean, emakumeak ere tarteko dirala, elikatzeko, ospatzeko eta alkarregaz bizi izateko eta alkar maitatzeko amesean.

Beharrezko doguz, senideok, "Biblia-Taldeak", "Otoitz-Taldeak"... Beharrezko doguz bakarreko otoitzaldiak, eta ebanjelio irakurketak... Beharrezko dogu ikastea eta mezatan *egoteaz* ez konformatzea... Beharrezko dogu

Elizearen zoriaz arduratzea, eta bakotxak bere zerbitzu lekua aurkitzea.

Horixe da Santiago apostoluaren liturgia ospatzeak eskeintzen deuskuna. Zein izango da gure erantzuna? Ez daitela izan, behintzat, santuak alkarren arteko lehian jartea, Jesusen jarraitzaile izatean gure eredu ikustea baino.

ESKARIAK

† Jainkoak bere erregetzearen autorle (testigu) izateko aukeratzen gaitu bere Semearen jarraitzaile. Esker onez egin deioguzan gure eskariak:

Eskatzen deutsugu, Jauna, —Aita/Ama zaitugu-ta.

- Apostoluen oinarri gainean eraikitzen dan Eliza honen alde: gaurko mundu eta egoera honetan izan daiten profetikoa eta ilunpeetan argi...
- Izan daigun guztiok argi Jesusek danoi egiten deuskula dei bere jarraitzaile eta Jainkoaren erregetzearen autorle izatera...
- Gure lehentasunen artean pobreak, bazterreratuak, gitxietsiak, erbesteratu eta espetxeratuak izan daitezcan, eta erregetzearen poza eroan ahal izan deiegun...
- Aintzat hartua ez dan, edo bazterreratua dan emakumeak bere duintasunezko lekua izan daian gure Eliza honetan...
- Eukaristiarako alkartu garanok gure sinismena aintzat hartzen, lantzen, ospatzen eta alkarbanatzen ikasi daigun...

† Jainko maitalea, alkarren zerbitzari nahi gaituzuna: emoiguzu apostolu kemena zure Semearen autorle izateko gaur eta hemen. Jesukristo gure Jaun berberaren bitartez.

—Amen.

Oparien gaineko otoitza

Garbitu gagizuz, Jauna,
zure Semearen nekaldiko bateo salbagarriaz;
Kristoren kaliza edateko
lehenengo izan zan Santiago apostoluaren jaiegunean

opari atsegingarria eskeini deizugun. Jesukristo.

Prefazioa

V./ Jauna zuekin.....R./ Eta zure espirituarekin
V./ Gora bihotzak.....R./ Jaunagan daukaguz
V./ Eskerrak Jaungoiko gure JaunariR./ Egoki da eta zuzen.

Egoki da, bai, eta zuzen
non-nahi ta beti zuri eskerrak emotea,
Jauna, Aita guztiz santu,
Jaungoiko ahalguztidun, betiko Artzain Horri.

Santiagook, Kristoren testigu kutunak iragarri eban
zure Semearen heriotza ta biztueratik datorren erreinua,
eta bera izan zan apostoluen artean lehenengoa
Jaunaren kaliza edaten;

beronen zaindari-laguntzaz
gordeten da sinismena gure herrietan,
eta zabaltzen lur osoan;
bera dabe lagun zугanako bidean errones doazenek,
zugana heldu arte,
Jesukristo gure Jaunaren bitartez.

Horregaitik, Jauna, aingeru guztiekin batean
orain eta beti goosten zaitugu,
fede apalez abesten deusugula. **SANTU, SANTU,
SANTUA**

AMAIERAKO OHIKUNEAK

OTOITZA

Eskerrak emoten deusuguz, Jauna,
gure zaindari dan Santiago apostoluaren jaiegunean
hartu doguzan dohai santuekaitik;
bera laguntzaile dogula,
zaindu gagizuz beti zeure babespean.
Jesukristo gure Jaunaren bitartez.
—Amen.

Azken onespena

† Jauna zuekin.

- *Eta zure espirituarekin*

† Bedeinka ta gorde gaizala Jainko ahalguztidunak:

Aitak eta Semeak eta Espiritu Santuak.

- *Amen.*

Jaunartzerako

¹ JESUS MAITEA ZAN azken afarian

Bera emon nahirik ardao ta ogian

guretzat zalarik hilteko aurrean

maitasunak eukan bihotza

menpean.

² Apostoluei minez esan dautse:

«Ni gaur saldua naz, bihar hilgo nabe.

Aitarenganako denpora jat bete

Hona orain zenbat zaituedan maite».

**Gurtu daigun beti
Jesus Jainko Jauna
Sakramentu honetan
gurekin dagona.**